

Ny Baiboly ho an'ny ankizy
dia manolotra



Ilay
vehivavy
Samaritana



Nosoratan'i: Edward Hughes

Sarin'i: Lazarus
Alastair Paterson

Nampifanarahin'i: Ruth Klassen


Nadikan'i: Fikambanana "Ndao mba hiaraka aminay" na
association "Allons ensemble" FJKM Nazareta Amborovy
Mahajanga Madagascar

Novokarin'i: Bible for Children
www.M1914.org


©2021 Bible for Children, Inc.
Azo atao ny fandikana na fakana ity tantara ity
nefa tsy ho amin'ny fitadiavam-bola.




Ary niainga Jesoa sy ny mpianany ka nandeha ary namaky an'i Samaria, dia tonga tao amin'ny tanàna anankiray atao hoe Sykara.




Nisy fantsakana iray izay namboarin'i Jakoba rain'ny Israely fony fahavelony tao, izay fakan'ny mponin'ny Sykara rano fisotro.



Satria nafana be ny tapak'andro hariva, dia nipetraka teo an-tsisin'ilay fantsakana Jesoa mandrampiangy ireo mpianany nandeha nivity sakafo tany Sykara.





Jesoa irery no nijanona
teo - saingy tsy naharitra
izany. Indro nisy
vehivavy iray mponina
tao Sykara avy mba
hantsaka rano.

"Omeo rano aho
hosotroiko", hoy
Jesoa taminy.




Taitra ravehivavy raha nahare izany ka namaly an'i
Jesoa nanao hoe: "Nahoana Ianao izay Jiosy indray
no mangataka rano amiko
hosotroina, nefa izaho
vehivavy Samaritana?"

Tamin'izany vanim-potoana
izany ny Jiosy dia tsy
nanana fifandraisana
mihitsy tamin'ny
Samaritana!



Ary vao mainka tena
taitra indrindra izy
rehefa niteny taminy
Jesoa hoe: "Raha
fantatrao hoe Iza
moa Aho, dia ianao
no nangataka tamiko
rano velona".





Ravehivavy niteny tamin'i
Jesoa hoe: "Tompoko, tsy manana
fanovozana Ianao, sady lalina ny fantsakana;
koa avy aiza no ahazoanao izany rano velona izany?
Moa Ianao va lehibe noho i Jakoba raintsika,
izay nanome anay ity fantsakana ity...?"





Jesoa namaly ka nanao taminy hoe: "Izay rehetra misotro ity rano ity dia mbola hangetaheta indray; fa na iza na iza no misotro ny rano izay homeko azy dia tsy hangetaheta mandrakizay. Ny rano izay homeko dia tonga loharano moboiboika avy ao anaty ho fiainana mandrakizay".






Ary hoy ravehivavy
taminy: "Tompoko,
omeo izany rano
izany aho, mba tsy
hangetaheta na
hanketo hantsaka
intsony".




Ary Jesoa naniraka an-dravehivavy hampiantso ny vadiny. "Tsy manambady aho", hoy izy namaly. "Efa nanambady in-dimy ianao, ary tsy vadinao ilay itoeranao ankehitriny" hoy Jesoa taminy.



Niaiky ravehivavy fa Mpaminany Jesoa. Nanontany ankolaka an'i Jesoa ny amin'izay toerana tokony hivavahana amin'Andriamanitra izy: any Jerosalema ve sa eny an-tendrombohitra masin'ny Samaritana? Nilaza taminy Jesoa fa ireo izay tena mpivavaka dia mankasitraka ny Ray amin'ny Fanahy sy ny fahamarinana.



Ary hoy ravehivavy tamin'i Jesoa: "Fantatro fa ho avy ny Mesia. Ka rehefa tonga Izy dia hambarany amintsika ny zavatra rehetra". Jesoa nilaza taminy fa Izy izay miresaka aminy no Izy. Tamin'izay indrindra, tonga ny mpianatra fa ravehivavy kosa lasa nandeha, namela ny sininy ary niverina tany an-tanàna.




Nony tonga tany Sykara ravehivavy dia nanambara tamin'ny olona rehetra tao nanao hoe: "Andeha hizaha izaroa Lehilahy izaroa, Izay nilaza tamiko ny nataoko rehetra", "Izao angaha no Kristy?" Dia nivoaka avy tao an-tanàna ny olona ka nankeo amin'i Jesoa.




Raha mbola tsy tonga ny olona, dia nasain'ny mpianany nisakafo Jesoa. Fa hoy Izy tamin'izy ireo: "Ny sakafoko dia ny manao ny sitrapon'Izay naniraka Ahy ary manatanteraka ny asany". Io asa io dia ny hitaona ny olona ho ao amin'Andriamanitra.





Maro be arak'izany ny Samaritana no nino an'i Jesoa noho ny filazandravehivavy. Nangataka tamin'i Jesoa izy ireo mba hitoetra tao aminy, ary dia nitoetra tao roa andro Izy.





Ary mbola
nihamaro
isa ireo nino
Azy noho ny
faminaniany.
Hoy indrindra
izy ireo: "...ny
tenanay no
nandre, ka
fantatray fa
Izy tokoa no
Mpamonjy izao
tontolo izao".



Ilay vehivavy Samaritana

Tantaran'ny Tenin'Andriamanitra, ny Baiboly,

Tao amin'ny bokin'ny

Jaona 4

"Ny fanambaràn'ny teninao dia manazava."

Salamo 119:130



Tapitra



Ny tantara ao amin'ny Baiboly dia miresaka amintsika ny amin'Ilay Andriamanitsika mahafinaritra, Izay namorona antsika ary maniry ny hahafantarantsika Azy.

Fantatr'Andriamanitra fa manao zava-dratsy foana isika, izany no antsoiny hoe "fahotana". Fahafatesana no sazy ho antsika noho ny otantsika, saingy tian'Andriamanitra tokoa isika ka nomeny Jesosy Zanany ho faty teo amin'ny hazo fijaliana, mba ho voasazy noho ny helontsika. Avy eo nitsangana tamin'ny maty Jesosy, ary niakatra any an-danitra! Raha mino an'i Jesosy ianao, ary mangataka Aminy mba hamelàny ny helokao, dia havelany tokoa izany! Honina ao aminao Izy, ary ianao honina miaraka Aminy mandrakizay.

Raha te-hibebaka hiala amin'ny fahotanao ianao,
dia izao no afaka lazainao amin'Andriamanitra:

Ry Andriamanitra ô, mino aho fa maty ho ahy Jesosy, ary velona Izy ankehitriny. Miangavy Anao aho, Tompo ô, midira ao amin'ny fiainako, ary mamelà ny heloko, mba hahazoako fiainan-baovao, ary ho avy ny andro handehanako eny Aminao ho mandrakizay. Ampio aho ho velona ao aminao, tahaka ny Zanakao. Amena.

Vakio ny Baiboly ary miresaha amin'Andriamanitra isan'andro!
Jaona 3.16

